



Damondas da baghegiar

Nr. 114/2022

Datum da publicaziun: 07-10-2022
Patrun: Cathomas Ciril e Fabian, 7176 Cumpadials
Liug e parcella: Cumpadials-Cantun; 2932
Object: ulivaziun da terren per via d'access e parcadis

Nr. 118/2022

Datum da publicaziun: 07-10-2022
Patrun: Maissen Mario, 7128 Riein
Representant: Lennari.ch, 7127 Sevgein
Liug e parcella: Sumvitg-Barcuns Dado; 4203
Object: spazzar e reconstruir clavau

Nr. 119/2022

Datum da publicaziun: 07-10-2022
Patrun: Jacomet Andrea, 7173 Surrein e Gasser Michael, 1867 Ollon
Representant: Jacomet Andrea, 7173 Surrein
Liug e parcella: Rabiun-La Foppa; 46
Object: construcziun d'ina casa d'ina famiglia cun habitaziun integrada

Nr. 120/2022

Datum da publicaziun: 07-10-2022
Patrun: Maissen Curdin ed Ursula, 7172 Rabiun
Representant: Tarcisi Maissen SA, 7166 Trun
Liug e parcella: Rabiun-Fravia; 116 / 506
Object: construcziun d'ina casa d'ina famiglia e d'ina casa d'ina famiglia cun habitaziun integrada

Nr. 121/2022

Datum da publicaziun: 07-10-2022
Patrun: Columberg-Schnoz Mario ed Annamaria, 7175 Sumvitg
Liug e parcella: Sumvitg-Quadras Sut; 4173
Object: sanaziun dil tetg

Il profils ein tschentai ed il plans da construcziun ein deponi tier la canzlia communal.
L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Sumvitg, 07-10-2022

Cumissiun da baghegiar

Uffeci civil Surselva

Naschientscha

Lechmann Lauro, naschius ils 26-09-2022 a Glion, affon da Remo e Carin Lechmann, sesents a Rabiun.

Sumvitg, 07-10-2022

Controlla da habitonts

Energia e scarta. Lein buca sfarlatar ella.

Il svilup geopolitic savess procurar igl unviern 2022/2023 per scartezia d'energia en Svizra. Gia cun pintgas midadas dil cumpurtament sa vegnir spargnau massa electricitad ed aschia contribuui ina cumpart per impedir ina crisa d'energia. La suprastanza communal ei dil meini ch'era la vischnaunca ei obligada da prender mesiras per reducir il diever d'energia e ha perquei decidu en sia seduta dils 27 da settember 2022 entginas mesiras per spargnar energia per diever communal. Ei settracta denter auter da suandontas mesiras:

- optimar l'illuminaziun publica dils vitgs,
- sminuir la temperatura en ils baghetgs communalis,
- optimar il diever dils apparats electronics ella canzlia communal ed els biros dils uffecis communalis
- e desister sin illuminaziuns da Nadal.

Sin la pagina d'internet www.sumvitg.ch ein tut las mesiras decididas per spargnar energia dalla vischnaunca publicadas.

Cun pintgas midadas da cumpurtament saveis era Vus contonscher in grond respargn d'energia. Sin la pagina dalla confederaziun www.nicht-verschwenden.ch anfleis Vus buns cussegls co Vus saveis reducir l'energia en Vies tenercasa.

Ina schelta da mesiras per reducir il diever d'energia

- Emplenir cumpleinamein maschinas da resti ni maschinas da schubergiar vischala.
- Tschentar giu apparats electronics ed impedir il diever d'electricitad entras Stand-by.
- Tschentar en la frestgera sin 7° e la schelentera sin -18°.
- Duvrar uviarchels dallas cazzettas per cuschinar.
- Scaldar mo l'aua necessaria per cuschinar.
- Far la duscha enstagl da far bogn.
- Pender si il resti e desister sin la schigentera.
- Optimar la temperatura en casa. La temperatura en casa duess buca survargar 20°.

Lein comunablamein spargnar energia en favur da nus tuts e d'in unviern senza crisis.

Sumvitg, 07-10-2022

Suprastanza communal

Curdem da gronda dimensiun

La vischnaunca organischescha ina rimnada da rufid bloccont sco suonda:

Venderdis, ils 28 d'october 2022 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas ein da transportar directamein e sin cuost dil caschunader ella deponia regiunala a Rueun. Rumians vegnan buca pri encunter. Tals rumians ein da plazzar als plazz da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds senza ieli e benzin, da tuttas sorts fier, maschinas electronics senza ieli, mobiliar movibel buc culau giu, requisits dil temps pigns
- per pneus senza gavegl vegn incassau ina taxa da frs. 5.--, cun gavegl frs. 10.--
- per pneus da maschinas agricolas pintgas vegn incassau frs. 20.-- e per pneus da tractur frs. 50.--.
- Calzers da skis san vegnir dai giu en favur dalla ARGO Tavau per frs. 5.--

Buca acceptau vegnan

- tuttas maschinass agricolas, lenna da brisch, veglia e da baghetg, sacs da pupi ni plastic, materials da pachetar, requisits dil temps liber grond, blachas da ballas da silo, curdems da baghetg, curdem verd da curtin (deponia verda), cartun e pupi vegn rimnau entras la scola

Ils suandonts rumians vegnan rimnai cun ils rumians jamnils:

- sacs tochen 50 kg; 1 marca da frs. 2.50, rumians pigns tochen 100 cm liung / 60 cm lad / 60 cm ault e pli levs che 12 kg; 2 marcas da frs. 2.50 e rumians pigns tochen 100 cm liung / 60 cm lad / 60 cm ault entochen ina peisa da 30 kg; 3 marcas da frs. 2.50.

Nus appelein alla responsabladad da vischinas e vischins e supplichein da setener vid quellas directives en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels e puni.

Per ulteriuras informaziuns stat la geraua responsabla bugen a Vossa disposiziun.

Sumvitg, 07-10-2022

Departament ambient

Preparaziun sin temps d'unviern

Tenor art. 69 dalla lescha da baghegiar ei la vischnaunca autorisada da schar dismetter la neiv dils implonts publics d'avertura sil schischom privat cunfinont cun prender il duiu risguard sin baghetgs, implonts e cultiras. Per liung dallas vias publicas e privatas ein seivs demontablas ni implonts da tal gener d'allontanar. Ultra da quei ston caglias e roma vegnir tagliadas anavos aschia che la rumida da neiv vegn buca impedita.

Quellas lavurs da preparaziun sil temps d'unviern ston vegnir exequidas entochen alla fin d'october 2022. En cass d'omissiun refusescha la vischnaunca suenter la sesiun d'unviern scadins donns occuri ord la rumida da neiv.

Sumvitg, 07-10-2022

Departament traffic

Rumida da neiv 2022/2023

La vischnaunca exequescha era uonn puspei sin incarica la rumida da neiv per privats. L'indemnisaziun per quella lavur corrispunda allas cundiziuns che l'industria privata pretenda. Plinavon sto quella dismessa da neiv star anavos en prioritad alla rumida dils implonts publics d'avertura. Sche pusseivel duei l'incarica vegnir surdada alla vischnaunca mo leu nua che quella procura era la dismessa dallas vias cunfinontas. Vischinas e vischins che vulan schar exequir la vischnaunca la rumida da neiv da lur vias e parcadis privats durant gl'unviern proxim ein supplicai d'annunziar quei a scret ni per telefon entochen ils **31 d'october 2022** al cau dil menaschi stradal (tel. 079 483 52 97).

Sumvitg, 07-10-2022

Departament traffic